

建德縣志卷之二十

雜志

祥異

宋紹興二十一年定林寺桑生李實栗生桃實

許志及府志皆作宣和二十一年而江南通志

則作紹興二十一年按宋史徽宗十九年改元宣和至八年欽宗即位是宣和無二十一年矣應從通志

十六年石門民家籬竹生重萼牡丹竈鼎產蓮花若金色

明洪武三十一年五月六日大水

永樂十四年丙申大水七月山蛟並出損壞田廬甚多

正統三年大稔明年春復饑

建德縣志

卷之二十

雜志
祥異

一

成化十年甲午大有年

二十一年乙巳旱災

二十三年大旱

宏治元年戊申大饑

正德六年辛未大有年

十二年丁丑五月山出蛟損壞田廬民有全家溺死者秋大疫

十三年戊寅夏大水

嘉靖二年旱

三年春夏饑疫

十三年夏六月大水冬十二月地震

二十四年大饑夏大旱

四十年春地震水災

隆慶三年六月暴風拔木傷人損稼

萬歷四年丙子大有年

八年大水山崩石決平地水高數丈是歲大侵

九年辛巳大饑

十七年己丑歲旱大饑

二十一年癸巳有年

建德縣志

卷之二十

雜志
祥異

二

二十五年丁酉五月大水

二十七年己亥大有年時斗米值錢五十文邑無盜賊夜戶不閉

三十六年戊申大水城內行舟兩月

四十年壬子天井堯封保孔祠室有燕巢於梁環爲門者五狀若

蓮華

四十二年甲寅四十三年乙卯皆大水西北郊田禾盡沒

四十七年己未十一月丙子三十日有三大鳥黑色各丈餘立玉

峯巔或曰鶚也

四十七年秋夜月色晴朗雷忽擊死三人三人異居而屍聚于一

地旁有牧兒竟無恙

泰昌元年冬十二月十八大雪至正月

崇禎元年戊辰七月大水

四年辛未冇年

七年甲戌冇年

十年丁丑三月民大饑餐黃土名觀音粉多腹墜病

十三年庚辰民訛言竈神降所在迎祀計口出錢雖小兒無遺者

十四年辛巳冬月民大饑有掠人而食者

十五年壬午春民多饑死秋蟲食粟苗松葉一望如焚冬多虎時

建德縣志

卷之二十

雜志
祥異

三

孔貞運里居告郡邑檄貴池獵人捕之殺七虎中有一虎孕四焉
十六年癸未秋冬不雨前河水三處斷流後河魯公堰斷流一里
許

十七年東叅民陳姓家猪產象形無毛

國朝順治二年三年皆有年

四年丁亥三月至六月穀貴民大饑米每石至銀六兩

五年六月初九日大水邑治後蛟起湧水二丈餘官倉貯米豆盡

漂時所在山蛟並出政坑舖凌家左側山崩壓田百餘畝多溺死

者

八年辛卯元日地震二十七日大雪雷電交作文廟柱裂六月有蟲食松葉自彭澤至邑柴坑凡百餘里皆盡有蟲食禾苗歲不登二十九都有獸如駁馬食虎者四

九年二月十五日地震

十一年有年

十六年大有年

十八年大旱十一月二十三夜雷震

康熙元年春二月民饑春三月北城儒學櫺星門右久枯楮木復生

建德縣志

卷之二十

雜志
祥異

四

十年夏池饑

四十五年五月鄉民陳霈之妻黃氏一產三男皖撫劉題請奉旨照例給賞米布

四十七年鄉民汪璧生妻何氏一產三男皖撫劉題請奉旨照例給賞米布

五十五年旱

乾隆二十九年江水漲入城內市口三尺許至城隍廟止一月方退三十一年三十二年俱大水

四十一年大有年

五十年大旱民饑野殍無數

五十一年大有年

五十三年大水

嘉慶七年大旱民饑

十年六月大風雨上鄉青山蔡姓祖墓下陷十餘丈壠木墓道隨

下如故塚

十九年旱民饑

二十年有年

二十二年二月員家山王之吉妻歐陽氏一產三男

建德縣志

卷之二十

雜志
祥異

五

二十四年三月十三日大雨山水陡發八字塢汪姓毀沒十餘家

男女溺死三十九人

二十五年旱

道光元年有年

八年旱

十五年大旱民饑至食觀音粉

或云即
禹餘糧

死徙亦衆

十九年西溪大塢隕石廣丈餘長倍之

二十七年大有年

二十八年二十九年江水漲入城內市口深七八尺自南嶺以南

至堯渡迄栗樹下俱通舟矮屋全沒樓房亦淹過半

二十九年上鄉塘水溢如急浪湧起逾時乃定

三十年江水溢較二十八九年小三尺許六月蛟水亦大南關外

漂民房甚多上鄉楊林河水及樹杪

咸豐三年雨豆

六年五月果園古松林有五鶴來巢

同治元年六月蛟水大作南關有巨屋一所及民人二十餘口同漂去

二年秋大疫民得痲足病半日即死十二月大雪至三年正月初

建德縣志

卷之二十

雜志
祥異

六

止約深六尺民多凍死

三年旱大饑民食樹皮觀音粉腸被塞多有死者是年有惡獸路
遇人輒攫食之或夜入人家嚙人

五年三月天雨雹豆麥大傷屋瓦多被擊毀

六年麥秀兩歧

八年九年俱大水城內市口行旛數月始退

十年八月大板新莊雨豆其色斑

光緒二年分流民遇一獸獨足狀似山羊羣捕而剖之內堅實惟
一腸至臍止是年閏五月有妖僧以黃紙爲人形咒之能飛翦人

辦居民多不安數月乃滅

七年六月慧星見寬八尺計長十餘丈

十年六月十一年四月蛟水俱大砂石沒田地無算民有漂死者

二十三年旱民饑

二十六年夏金星晝見

二十七年大水升米百錢米價從此騰貴

三十二年九月朔大板等堡地震

三十三年春熒惑入南斗夏彗星見於東南

三十四年夏大水秋大旱

建德縣志

卷之二十

雜志
撫紀

七

宣統元年大水大旱民饑

二年夏彗星竟天

撫紀

吳志周魴傳魴譎曹休曰使君若從皖道進住江上魴當從南對岸歷口爲應池州府志吳歷口即歷山之口路史歷山在東流縣東二十里高八十丈與建德縣接壤按以歷口爲歷山之口古地志無之然是時魴住鄱陽道建德出歷山至江口於當時事理亦合也

馬令南唐書柴克宏傳常州有隋末司徒陳杲仁祠杲仁見夢於克宏曰吾與陰兵助爾及戰有黑牛二頭衝突越兵克宏繼之大敗越人俘馘甚衆克宏奏封杲仁爲武烈大帝按建德所祀

建德縣志

卷之二十

雜志
撫紀

八

余公神爵與陳司徒同或謂神即陳姓

通鑑梁南津校尉江子一帥舟師欲邀侯景其徒皆潰子一亦還梁主責之子一拜謝曰臣以身許國嘗恐不得其死今所部皆棄臣去臣一身安能擊賊若賊遂能至此臣誓當碎身以贖前罪至景圍臺城與弟子四子五帥所領百餘人開門出戰子一直抵賊營徑前刺賊後皆不繼賊解其肩而死者四子五相謂曰與兄俱出何面目獨旋皆免胄而死按建德祀威烈將軍江子五載此事小異

江南通志仙寓菴在池州府孝一保仙女山相傳建德檀氏女

學道於此成仙

〔虞集道園文集〕建德夏良器學識昌偉汲引晚進惟恐弗及嘗作陳嘉績字說云陳君嘉績家世縉紳設義學以廣教謹士行以裨躬固足有用於世其父兄所以名之者蓋有望於嘉績矣此說見舊志第不知嘉績爲誰何人耳

〔池州府志〕永樂靖難師初入金陵建文出幸貴池黃侍中勤王舟次李陽河家人報云上已過池之建德矣

邑人李植自志其墓碑曰建之罹兵革者自趙宋以前七十餘矣惜載籍闕失不能備考

建德縣志

卷之二十

雜志

九

〔江桓瓶齋集〕仰赤心補撫州學官弟子其父繼江年未望七赤心在撫一日忽心動倉卒言旋未旬餘繼江死人以爲至性所感云服闋受世職千戶陞指揮天啓初解官歸里築室於居傍曰運甓

〔見聞存實書〕建德王建字立本敦善行好勸人爲善嘗言昔爲諸生時督學歲試後適分守某參政行縣諸生謁見惟問榜首幫補進學姓名人數而止越數日分巡某僉事至諸生謁見惟問黜退停降撲責姓名人數餘不問焉諸生私相論曰二公發問相反如此吾屬識之後分守官至戶部侍郎子相繼登第僉事陞陝西

副使遇安化王作亂死吁豈謂一問遂能致禍福哉存心有厚薄則一言一行皆適肖之即食報亦如之豈虛語耶葛穉堅服膺其言採之以勸善焉

說鈴崇禎癸未四月朔日食百官集禮部護日其竝立前後照朝班品級第一班之第三位爲周延儒上兩位則勳臣也延儒時側其笏於額以測望又指點形似以示左右之就言者而第四五班之僚屬前不能攀援延儒遠接一談後皆爲教坊司鑼鼓喧鬧同班中亦人衆語煩惟冢宰鄭三俊立二班之首白鬚鶴髮卓立如山敬慎之思徵於衣表自初食至復明爲時頗長未嘗寸步動

建德縣志

卷之二十

雜志

十

移稍抒襟袖毅然截然之象望而知爲典型大老

(廣陽雜記)鄭公三俊池州建德人南京戶部尚書轉吏部尚書取入北京吏部尚書以事充江甯驛徒公至南京青衣小帽至驛前向驛四拜而去遂歸建德鼎革時年九十矣以老得不出經畧洪公公之門人也至池州以舟迎公公怒罵不納其使經畧大哭

曰老師棄我矣終不得見而去

見潘文勤公祖蔭所刻功順堂叢書

(五石瓠)孔相國救復社 當溫體仁在位必欲究復社值其病在告孔公貞運秉筆遂決絕其案及溫入直殊怒語人云孔老先生近亦聽人提索矣姜公曰廣時家居曾語邑令郝錦云孔此

舉最得體但惜其鄉人曾思索賄耳此則姜公之聽熒也建德相公孔公貞運一生不言黨不好名不令人知其德劉宗周罷歸羈天津猶有疏至思宗甚不憚孔面奏調護者凡再四當天啓丁卯掌坊時魏璫薦監生四人厚贄拜門生意在營秋榜孔云我未必主試但俸深必見推諸生高才萬一得雋豈不似私拒之後推主試不點點陪推孫之繹同門姚現聞太史每言至此服其風節云

何孔 姚現聞太史語先師吳樓山曰何芝嶽孔玉峰爲相人多以伴食目之然孔之和平何之大雅適足以培養元氣兩公去

國後益不可再得

貴池劉鸞著
見昭代叢書

建德縣志

卷之二十

雜志

十一

(四庫全書別集提要) 東岡集十卷明柯暹撰暹字啓暉更字用晦建德人永樂乙酉領鄉薦年僅十六明年與修永樂大典進元兔詩授戶科給事中以三殿灾應詔陳言謫交趾驩州知州累遷雲南按察使致仕歸事蹟附見明史鄒緝傳是集乃暹晚年所手訂劉定之序稱其詩文奇崛出人意料今觀所作文豪邁有餘而落筆太快少滌洄渟蓄之致詩亦矢口即成不耐咀詠是登科太早才高學淺之故與 按明史鄒緝傳永樂十九年三殿灾詔求直言緝上疏言陛下肇建北京焦勞神慮幾二十年工大費繁調度甚廣冗官蠶食耗費國儲工作之夫動以百萬云云上怒謂

言者謗訕下詔嚴禁之犯者不赦侍讀李時勉侍講羅汝敬俱下
獄御史鄭維桓何忠羅通徐瑤給事中柯暹俱左官交趾惟緝與
主事高公望庶吉士楊復得無罪柯暹池州建德人由鄉舉出知
交趾驩州累官浙江雲南按察使

(藤陰雜記)裘大司空曰脩父君弼以建德令行取入都夫人禱
於燕子磯水神生公位至司空歿後家人夢公仍復神位並見隨
園詩話

(池州府志)魏觀建德詩曰乘舟至建德頗愛山水清山水雖可
愛人烟苦彫零種麥當縣前迂徑入縣庭瓦礫存故基小小才有

建德縣志

卷之二十

雜志

十二

廳父老匍匐來形影何伶仃再拜泣且言敝邑頻遭兵大則吳楚

交陳張小則侯許征阻兵者二人逆彼族必夷順此身必刑逃者凍餒連

竄者疾疫并所贖無幾家家戶無全丁爰從甲辰秋始見官府明
令簿來撫綏曲盡父母誠流離漸懷歸沉疴漸蘇醒田萊固多荒
未免賦役征里長紛並緣科需取餘贏語意殊可憐推言慰其情
去歲郡守朝綸音細叮嚀民爲邦之本本固邦則寧今而重傷殘
救恤誠在卿譬猶澗中魚魚樂澗欲盈又如水載舟水激舟必傾
此道垂昭昭卿等當力行軍乏捐冗條力殺止繕營治則待以寬
罰則裁以輕耕稼勗有時教養資有成苟或負所期憲度亟爾懲

懇懇數百言官庶曾其聽矧是半月餘捷音下三城疆土益廣遠
禮樂逾作興於窳宜勉旃行將慶昇平 按明史魏觀字杞山蒲
圻人洪武元年奉命以幣帛求遺賢於四方是以建德東流銅陵
皆有詩

（隨園詩話）乾隆癸酉建德徐鳳木自吟除夕詩云閱歷深知客
路難非關白首戀江干歲除一夕爭千古莫作尋常旅夜看莊念
農初宰建德即往相訪贈以二絕鳳木得詩喜刻之集中

（丹崖文集）洪仲遵博學精天文談星象輒應避元末兵讀書湖
上羅友賢倡亂誘致之仲遵不爲用仰觀乾象知其某日必亡密

建德縣志

卷之二十

雜志

十三

奏京師明太祖命常開平帥兵討之果應期授首

（瓶齋集）江桓庭植牡丹一本一夕夢四偉人酡顏絳衣幘揖桓
而笑中一人字四元解衣贈之桓厭其華不之受次日四花齊放
桓因此文思大進年十一遊庠父大任爲粵東恩平令桓隨任焉
時直使柳寅東觀風屬邑桓置一卷於恩平士中寅東拔第一評
曰此三吳兩越之秀何意於此得之其制藝之動人如此

（丹崖文集）張淑貞彥倫之女也彥倫以國法當死淑貞當配義
不受辱墜重淵以死數日不得適夫屍輿至河濱乃浮人莫不驚
遂舉以合葬洪仲遵爲之銘曰生佩明訓死全貞潔實命不猶罹

此兇阨魄墜重淵名齊雲月烈烈丈夫猶或屈節成仁取義乃在
女德悠悠千祀令人悽惻 按張淑貞應歸節烈志但集中未載
何時事亦未載爲建何處人事隔三百餘年難以查考附入雜記
以見貞操之不可終沒云爾

(王爾綱詩永)王南塘葛源人好施與見善必爲一夕夢松作人
語向南塘請命者醒誌之嗣携千金赴九華作佛事寺僧不知也
以衆人遇之怒而返適半嶺有老松將罹斧柯諦視與夢肖亟售
以重貲俾勿伐立亭其下名一松亭至今翠蓋翳然清蔭可十畝
許山賓吳非咏其事云一亭何事立松間松以名亭道往還自與

建德縣志

卷之二十

雜志

十四

九華天地老徂徠如夢也相關又云十八公知材不材與人何患
斧斯裁王家重見丁家夢世世將無取兆來

(王爾綱詩永)鄭烈婦姓閔揚州人順治乙酉歲建德文學鄭天
錫聘之婚有日矣會兵至閉城鄭不得入閔不得出城陷閔投井
死久之得屍遍體衣皆刺鄭字明此身許鄭也城定後女兄走告
天錫天錫感傷未幾亦物故其從弟又舒傳其事邑人王爾綱爲
作揚州鄭烈婦行閔本處子而題曰烈婦從其志也歌曰旌旗鐵
艦蔽江渾揚州水關晝閉門墨雲壓城援師絕閣部正氣凌乾坤
是時紛騰那堪說中有烈女心自捫密將郎姓衣中繡一字一淚

皆血痕遡郎家世擅文采高州太守稱公孫鸞膠不向田間續遠
涉江湖尋桃源如花貌甘沉井底吁嗟許嫁猶未婚女兄告郎郎
自誓願移遠櫬歸鄉園斯志未酬郎已逝有弟囑子闡幽昏余聞
此事發長慨節烈直由天性敦方今三藩就俘僇軍中醜態難盡
論縱有高者能引決焉知誰是誰家魂似此從容兼慨慷應與忠
烈名其尊我聞揚州梅花嶺史公衣冠塚具存我不作歌傳芳躅
忍使斯人聲暗吞

鄭宜振號西谷浮梁人少嗜學博通典籍與兄體仁齊名從遊者
衆守令子弟皆師事之明初徵辟不就因二親墓田遠在建德遂

建德縣志

卷之二十

雜志

十五

家於建之大田隱焉善真草書著有百寶裝集